



Aperet a ua mobilizacion !

Dissabte lo 21 d'octobre de 2017, 14 h 30, Prefectura, Bordèu

Supression deus CAE dens las escòlas Calandreta

Arron l'anoncia brutau e tot sobte deu government Macron de suprimir los contractes ajudats CAE-CUI, **las escòlas Calandreta que s'arretrobèn prèsas dens ua realitat amara e açò desempuish la rentrada.**

Amara per las personas qui an vist lo lor contracte non pas arrenovelat lo 30 d'agost per ua reprèsa deu tribalh lo 4 de seteme. Un moment mauaisit quan avem 55 ans e que coneishem la situacion de l'emplec. Amara taus regents qui s'arretrobàn a còps shens ajuda-mairau de 14 òras enlà. Amara taus parents qui's deven organizar d'urgéncia en benevolat per las guarderías e las cantinas.

Urosament, tots que guardan en cap que l'escòla sia doça per la rentrada deus mainats.

Mes aquera situacion non pòt pas durar dens lo temps.

Desempuish lo 5 de seteme, e arron sollicitacions e mobilizacions de las escòlas Calandreta mes tanben de numerosas associacions e eslejets, la situacion a un drin botjat au nivèu de la reconeishença deu problèma. Mes que demora sancèr permor shens nada solucion.

En Bretanha, las escòlas immersivas associativas e laicas Diwan (l'equivalent de Calandreta en lenga bretona) que s'escadón a obtièner rason lo 9 de seteme : los 48 contractes ajudats qu'estón validats per la prefectura de Bretanha. De mei, los 104 contractes qui devèvan arribar a echeança entre lo 1èr de seteme e lo 31 de deceme de 2017 qu'estón validats arrenovelats. Tanben, lo renouvelament deus contractes arribant a echeança entre lo 1èr de genèr e lo 31 de deceme de 2018 qu'interviènerà sus las dotacions budgetàrias de l'an qui vien.

Un mes mei tard, en Gironda, lo Prefècte que torna dus emplecs CAE-CUI tà la Calandreta de Pessac. Quauques dias arron qu'ei au torn deu Prefècte deus Pirenèus Atlantics d'atribuir tres CAE tà las Calandretas d'Artics, de Biost e deu Lis. **Cò qui ei possible en Bretanha, en Gironda o per quauques uns en Biarn qu'ac deu estar pertot e per tots.**

L'ensemble de las escòlas laicas en ensenhament immersiu (Calandreta occitana, Ikastola basca, Bressòlas catanala e ABC alsaciana) deven beneficiar de la medisha solucion que las escòlas Diwan, **simplica question d'egalitat republicana.**

Las escòla Diwan, com las escòlas Calandreta, que son devath contracte dab l'estat e qu'asseguran ua dobla mission de servici public. Lo de l'ensenhament e lo de la transmission de la lenga.

Diwan qu'a uei ganhat lo dret de poder orbir l'annada escolara de faïçon serena.

A nosautes de ganhar en Biarn, en Gasconha, en Lemosin, sus l'ensemble de l'Occitània.

La causida de suprimir los emplecs ajudats CAE-CUI, shens prevèder ni delais de transicion, ni solucion de remplaçament perena qu'ei ua decision politica. Tornar hicar en plaça CAE tà permèter a escòlas de foncionar, quitament si los "quotàs" son amendrits qu'ei possible. Qu'ei aci tanben ua question de causida e de decision politica.

Qu'insistim tanben suu hèit qu'au dia de uei n'avem pas nat engatjament clar pertocant l'arrenovelament deus contractes qui's debanarà dens los mes a vièner. **Qu'avem besonh d'aqueste engatjament, com ac avò Diwan, entà poder enfin tribalhar serenament.**

Qu'ei permor d'aquò que la federacion regionau de las escòlas Calandreta de Navèra Aquitània, l'ensemble de las federacions despartamentaus e de las escòlas **qu'apèran a un navèth amassadís lo dissabte lo 21 d'octobre de 2017 tà 14 h 30 davant la prefectura de Region de Bordèu entà exigir ua solucion d'urgéncia per uei.**

Mes tanben tà **aubrir pistas de tribalh necessàrias tà obtièner perenizacions d'aquestes pòstes** peu biais de las ajudas publicas. Qu'ei lo passatge obligatòri tà sortir los personaus e las nostas escòlas de la precaritat. **Un pas necessari tà ahortir l'avièner de la lenga nosta.**

Contactes presse

David Bordes / Tél : 06.28.04.35.79

Nathalie Cazenave / Tél : 06.32.19.09.18

Site internet : www.calandreta.org



Qui sommes-nous?

Les Calandretas sont des écoles immersives, associatives, laïques et gratuites. Elles sous contrat avec l'Éducation Nationale. Les pédagogies pratiquées (institutionnelle et Freinet) visent l'autonomie et le bien-être des enfants. L'immersion dans la langue et la culture occitane permet aux enfants d'être bilingue dès le CM2 et de faciliter l'apprentissage d'autres langues par la suite. Il existe 70 établissements Calandretas (primaire, collège et lycée) où sont scolarisés 4000 enfants dans tout le sud de la France. La première Calandreta a vu le jour à Pau en 1981.